

Nelayan asing penuhi laut Malaysia

Malaysia kini berdepan dengan pencerobohan dan kecurian hasil laut negara yang semakin serius oleh nelayan asing. Nelayan asing dari Indonesia, Myanmar dan Vietnam merompak hasil laut negara sama ada dengan mencerooboh masuk ke perairan Malaysia atau lebih licik menggunakan lesen bot tempatan.

Di bahu Agensi Penguatkuasaan Maritim Malaysia (APMM) terpikul tugas berat untuk memagar pintu maritim Malaysia daripada dibolosi nelayan asing. Malah lebih mencabar mereka juga perlu mematahkan pelbagai jenayah rentas sempadan lain antaranya memasukkan pendatang asing tanpa izin dan penyeludupan rokok, dadah serta minuman keras.

Wartawan *Sinar Siasat* berpeluang mengikuti pelayaran selama lima hari bersama kapal operasi APMM Selangor, *KM Bagan Datuk* baru-baru ini untuk mendedahkan tentang tugas berat pihak berkuasa mengawal samudera negara.



Penguat kuasa APMM Selangor mengeledah dan memeriksa sebuah bot nelayan tempatan di Selat Melaka setelah mengesan pekerja di atas bot merupakan warga asing.

PELABUHAN KLANG

Kegiatan nelayan asing yang mencerooboh masuk perairan negara untuk menangkap ikan menyebabkan Malaysia kerugian berbilion-bilion ringgit setiap setahun.

Nelayan asing terutamanya dari Indonesia, Myanmar dan Vietnam merompak hasil laut negara sama ada dengan mencerooboh masuk ke perairan Malaysia atau bagi mengaburi mata pihak berkuasa, mereka menggunakan lesen bot tempatan.

Malah, kegiatan mereka bertambah aktif apabila ada nelayan Malaysia yang tidak mahu turun ke laut menggaji pula nelayan asing itu untuk menangkap ikan.

Tinjauan wartawan *Sinar Siasat* baru-baru ini yang turut sama melayari Selat Melaka selama lima hari bersama Agensi Penguatkuasaan Maritim Malaysia (APMM) mendapati kegiatan pemilik lesen bot tempatan tetapi menggunakan tekong dan awak-awak warga asing adalah antara kes yang paling banyak ditemui.

Dalam operasi selama lima

Wartawan *Sinar Siasat* menyaksikan sendiri bot nelayan Indonesia memcut laju lari daripada kapal operasi *KM Bagan Datuk* dalam Ops Ehsan di Selat Melaka baru-baru ini.



hari menggunakan kapal *KM Bagan Datuk* itu, anggota APMM telah memeriksa 14 bot nelayan dengan tiga daripada bot tempatan itu telah ditahan kerana nelayannya ialah warga asing.

Selain itu, penguat kuasa APMM turut mengesan sebuah bot nelayan asing yang mencerooboh perairan negara.

Pada hari pertama operasi, Pegawai Memerintah Leftenan Komander Abdul Hakim Mohd Idris telah mengesan dan mengusir sebuah bot nelayan dipercayai

warga Indonesia yang licik. Bot itu dikesan pada kedudukan kira-kira 23 batu nautika dari Pulau Ketam.

Sejurus menyedari kehadiran kapal *KM Bagan Datuk*, tekong terus memcut bot hingga berjaya bolos ke perairan Indonesia bagi mengelak ditahan.

Sementara itu, pada hari kedua operasi, kapal *KM Bagan Datuk* mengesan sebuah bot nelayan tempatan yang sedang menangkap ikan menggunakan pukat tunda lebih kurang 11.8 batu nautika dari Tanjung Sauh, Selangor sekitar jam 5 petang.

Hasil pemeriksaan dan pengeledahan ke atas bot tersebut mendapati seorang tekong bersama tiga awak-awak tidak memiliki dokumen pengenalan diri yang sah dan dipercayai warga Myanmar.

Selang sejam, sekali lagi *KM Bagan Datuk* mengesan sebuah

bot nelayan tempatan yang sedang menangkap ikan menggunakan pukat tunda di lokasi sama.

Seperti bot pertama pemeriksaan juga mendapati seorang tekong bersama tiga awak-awak dipercayai warga Myanmar.

Esoknya, kapal operasi berkenaan berjaya mengesan sebuah lagi bot nelayan tempatan, kira-kira 6.1 batu nautika dari Tanjung Rhu, Selangor.

Pengeledahan ke atas bot tersebut mendapati seorang tekong bersama seorang awak-awak berusia 38 tahun dan 20 tahun memiliki pasport Indonesia dan mereka menggunakan pukat hanyut.

Dalam pada itu, berdasarkan statistik APMM, sepanjang tahun

2015 sehingga 2019, pihaknya telah menahan 634 buah bot nelayan tempatan yang melakukan pelbagai kesalahan termasuk menyalahgunakan lesen perikanan kepada nelayan asing.

Selain itu, statistik juga mendapati kes bot nelayan asing yang mencerooboh ke perairan negara saban tahun meningkat.

Pada tahun 2015, APMM menahan 107 bot diikuti 108 (2016), 148 (2017), 110 (2018) dan 151 tahun 2019 dengan jumlah keseluruhan 624 kes.

STATISTIK BOT NELAYAN TEMPATAN YANG DITAHAN

2015 - 158
2016 - 106
2017 - 130
2018 - 158
2019 - 82
Jumlah: 634 kes

BOT NELAYAN ASING CEROBOH PERAIRAN NEGARA

2015 - 107
2016 - 108
2017 - 148
2018 - 110
2019 - 151
Jumlah: 624 kes

BOT NELAYAN TEMPATAN DITAHAN GAJI WARGA ASING (APMM SELANGOR)

2016 - 11
2017 - 8
2018 - 14
2019 - 19
Jumlah: 52 kes



Pegawal dan anggota *KM Bagan Datuk* yang mengawal perairan negara.